

Kapitulo 1

Den reino di ken nos ta bibando aktualmente?

Mayoria di nos ta kere ku nos ta bibando den reino di Dios. Pero si nos lesa Efesonan 6:12, nos ta komprondé ku diabel a usurpá e mundu aki. Dios a traha tur kos, i ta doño di tur kos. Dios a pone Adam pa goberná riba tur kos (Génesis 1:27,28 i Salmonan 8:5-8). Ora ku diabel a konkistá Adam, e la konkistá e gobièrnu i tur e derechi ku Adam tabatin, i diabel a bira prens di e mundu aki, i a tuma lugá di Adam (Juan 14:30 i Job 1:6-8). E siguiente relato ta klara tur kos.

A yega un dia, ku e yu hòmbènan di Dios, mester a presentá nan mes dilanti di Dios. E yu hòmbènan aki no por ta angelnan, pasobra angelnan ta tur dia den presensia di Dios. Nunka mas diabel por dreña den reunion di e angelnan ku Dios (Revelashon 12:7,8). Pero si ta e Adamnan, di tur e otro mundunan ta presentá, pa trese rapórt di nan planeta, komo e promé hòmbèr òf e prens. Anto diabel a bira prens di planeta Tera, i ta haña tur derechi pa dreña huntu ku e otro Adamnan na lugá di e Adam di planeta Tera. "P'esei, alegrá boso, o shelunan, i tur, ku ta biba den. Ai di esnan, ku ta biba riba tera i den laman; pasobra diabel a baha den su gran furia riba boso, pasombra é sabi, ku su tempu ta kórtiku." (Revelashon 12:12).

Ta bon pa nos komprondé ku tin tres shelu. Shelu ta konsisti di tres parti. E promé shelu ta kaminda e paranan (Mateo 8;20, Génesis 1:28) i e nubianan ta. Santiago 5:17,18 ta bisa ku Elias a sera shelu. E di dos shelu ta kaminda e planetanan ta. (Revelashon 12:12) Apóstel Pablo a papia di e di tres shelu. (2 Korintionan 12:2)

Esaki tabata bon pa e otro Adamnan por a komprondé, ku hende por para e reinado di diabel pa Dios reina riba nan. Si tin un hende so, ku por para e reinado di diabel pa Dios reina riba dje, Hesus lo a bini pa muri p'e so. Ken ku para reinado di diabel ta salba.

Hesus ta kontesta Pilato: "Mi reino no ta dje mundu aki, si Mi reino tabata dje mundu aki, Mi sirbidónan lo a bringa, pa Mi no wòrdu entregá na e Hudiunan; ma awor Mi reino no ta dje mundu aki." Juan 18:36 Pilato no a komprondé Hesus, te e promé dia di siman ora ku un di e sirbidónan ku Hesus tabata papia di dje a baha for di shelu i pone e armada romano na suela manera morto. No tabata e momentu ainda, pero e por a kaba ku e armada romano kompletamente. (Mateo 28:2-4)

Diabel ta ofresé Hesus e reino

Diabel ta ofresé e reino di mundu. (Lukas 4:5-8) Mundu i reino ta dos kos separá. Dios a krea mundu, i tur kos ku ta den dje ta di Dios, pero e gobièrnu ku tabata den man di Adam, diabel a haña dor di a konkistá Adam.

Hesus no a sede na diabel. E la sigui e boluntat di Su Tata te na morto i resurekshon. Pero nunca tabata Hesus Su plan pa tuma e reino di mundu pa e santunan. E reino aki Hesus lo destruí i pone e reino di Dios na su lugá. Pues no ta e reino aki e santunan lo haña. E piedra lo dal e imágen kaba kuné, i bientu lo bai kuné (Daniel 2 i Revelashon 21 "Shelu nobo i tera nobo").

Den e orashon di nos Tata (Mateo 6:9) Hesus a pone e reino komo promé petishon na nos Tata ku ta na shelu. E reino promé ku pan. Ken ku ta buska pan promé ku reino, nunca lo drenta e reino. Lesa Mateo 6:25-34 i komprondé ku Dios ta konsehando hende pa no buska nada promé ku e reino di Dios. (Mateo 6:32,33) "Laga Bo reino bini, ku Bo boluntat sosodé na tera meskos ku na shelu."

Kon Dios Su boluntat lo sosodé na tera meskos ku na shelu? Pa esaki sosodé Dios ta kambia hende tres bes: 1. Ora ku e Evangelio yega na e hende. 2. Ora ku Hesus bini E ta kambia e hende pa bai shelu pa mil aña (1 Korintionan 15:50-54). 3. Den e mil añanan Dios ta kambia nos kompletu.

Tur hende lo bira manera Adam i Eva. Lo tin un nashon i un idioma. E nashon i e idioma ku Dios a pone promé ku piká. Importante ta pa e hende sa, ku ta e mes, Dios ta kambia pa e biba eternamente. E reino aki, nunca mas ta bini na memoria di hende; no por keda nada di e reino bieu aki den e reino nobo (Revelashon 21:4,5, Isaias 65:17, Isaias 43:18).

Dikon diabel tin tantu poder riba tera? Pasombra Dios a manda Adam dominá tera i tera someté na Adam. Na momentu ku diabel a konkistá Adam, e la haña e dominio i tera a someté na diabel. Ta hustamente pa e rason aki tambe, ku tin tantu maldat i peliger riba e mundu aki. (Génesis 3:17-19) Dios a bisa Adam ku tera ta maldishoná pa su motibu. Ora ku Dios a entrega e mundu den man di Adam pa gobern'é Dios a keda Kreador i Doño di shelu i tera. P'esei awe tur hende por yega ku konfiansa buskando yudansa i protekshon serka Dios. Tur Dios Su moveshonnan ta den hustisia.

Hustisia di Dios

Pa hustisia, Dios no a mara diabel su man, pasombra Dios a krea Adam un ser liber, los. Pa hustisia Dios no por kohe ku man, òf fòrsa hende, pasombra diabel no a kohe ni fòrsa hende. E la papia i hende a kere, p'esei pa kumpli ku tur hustisia, Dios tambe ta papia i esnan ku kere lo ta salvá. Ken ta e hende ku lo eredá e reino di Dios? (Lukas 12:31, 32) Beibel ta papia di un trupa chikitu ku lo drenta, pasombra ta masha poko hende ta realisá ku nan mester pèmiti Dios hasi kambionan den nan bida. Siudadanonan di e reino di Dios mester ta diferente. Tin tres kambio ku mester tuma lugá.

Kambio I: **E MENTE.** (1 Pedro 3:20,21)

Ta masha importante pa nos mente ta renobá pa un mente di shelu. (Romanonan 12:1,2) Esaki ta masha importante pa nos por stima shelu, bandoná plasernan

mundano i kuminsá gosa ku shelu i hisa nos kara ariba buskando e goso ei. Si e promé kambio ta realisá den mi bida, i mi keda fiel, ora Hesus bini e di dos kambio lo tuma lugá.

Kambio II: E TRANSFORMASHON. (1 Korintionan 15:50-52)

Na momentu di e binida di Hesus tur enfermedat lo ta kurá. Esei ta transformashon di e kurpa. E kurpa lo ta sano i fresku wardando e di tres kambio.

Kambio III: E KURO DI NASHONNAN. (Revelashon 22:2)

Lo no tin ningun maldishon mas. Tur loke a bini dor di maldishon lo ta kitá. Diferente nashon i idioma a bini dor di maldishon di piká. Si den e tera nobo lo tin nashonnan manera awor, ta inevitabel e divishon, pasobra kada hende lo uni ku su mes nashonalidat i rasismo lo sigui den e reino nobo. Pues Dios ta sigui ku e plan ku Dios tabatin ku planeta Tera. E kosnan ku a bini di maldishon di piká lo no dreña e reino nobo. E igualdat lo ta komptetu. Lo no tin riku ni pover. Ni un hende lo sirbi otro. Tur piká ku nos arepentí di dje awor aki lo keda den nos memoria miéntas ku nos ta biba. Dios ta kita e malu di nos memoria i duna nos e memoria ku Adam tabatin promé ku e la kome di e fruta prohibi. Anto Dios ta hiba nos na e palu di bida pa nos kome di dje. Kumplimentu di David su orashon den Salmo 51:10,11. Nunka mas David lo kòrda e piká ku e la kometé kontra Urias. Dios lo saka e mente òf e kurason ku sa bon i malu i duna e salbánan un kurason òf mente nobo i e Spiritu rekto. (Génesis 3:21-24, Isaias 65:17-19) Beibel ta mensioná ku e blachi di e palu lo ta pa kura e nashonnan. Esaki ta pa kita e último rastronan di piká, i hende ta bira manera Adam tabata promé ku piká. Adam i Eva nunka lo por ta felis, si nos keda manera nos ta awor, kórtiku i straño. Nan lo ta konfrontá ku konsekuensia di nan piká konstantemente i karga duele. Esei lo no ta un bon bida eterno pa Adam i Eva.

Esun ku biba den e reino di diabel aki lagando Dios, E bon Wardadó, reina riba dje, e mes lo ta siudadano di e reino di Dios. Beibel ta bisa ku Dios ta destruí e reino aki. (2Pedro 3:9-13) Segun Daniel 2:35, un bientu a supla e reino aki bai kuné i nada a keda patras i e piedra a krese i yena henter e mundu. Dios mes lo limpia e mundu aki i establese Su reino nobo. (Revelashon 21:2-8)

Hesus a primintí tur kos na esnan ku buska e reino aki na promé lugá. (Mateo 6:33) Si nos komprondé esaki bon, ni esposo(a), ni trabou, ni plaser mester ta mas importante ku buska e reino di Dios. Tin testimonio di hendenan ku despues di a buska e reino promé, nunka mas a buska trabou pero ku ta traha tur dia. E persona ku a komprondé Dios Su palabra ta dependé riba Dios pa haña i konserbá su trabou. Dios ta bendishoná ku trabou, salud, forza i sabiduria pa ehersé esaki.

Tokante di matrimonio, hende no ta kapas di skohe riba komprondementu propio pasombra hende tin e kapasidat di skonde e defektonan di su karakter te matrimonio. Hende hòmer por lo general ta buska un aparensia bunita manera

prinsipalmente e kara i e figura di kitara. Hopi biaha ta te ora bo tin n'e den kas i ku e habri tur e kuérdénan bo ta realisá ta ki tipo di kitara bo a karga trese kas. Chistoso no? Pero e seriedat di e asuntu ta, ku Hesus ta konsehá nos pa buska promé e reino di Dios, i Dios mes lo supli nos nesesidat di trabou i parehá pa matrimonio. Algun ku a drenta enlase matrimonial promé ku e evangelio a yega na nan, tabatin e suerte di a haña un bon hende. Esnan ku si ta pasando den e luchanan matrimonial, kòrdá ku Dios a primintí tur kos despues di e reino. Esaki ta inklui forsa i pasenshi pa sigui lucha te na fin ku e bunita speransa di e reino di Dios.